

# Pendirian Raja Nazrin amat disanjung

UM-14/5/2007.

REAKSI jujur ikhlas Raja Muda Perak, Raja Dr. Nazrin Shah menolak tawaran kerajaan negeri membelanjakan wang rakyat untuk perkahwinan baginda dengan Zara Salim Davidson pada 17 Mei ini mempamerkan satu sikap yang tidak ada tolok bandingnya.

Ia jelas menggambarkan tindakan jujur, ikhlas dan bertanggungjawab. Secara peribadi saya amat menyanjung tinggi hati budi seorang kerabat diraja yang begitu prihatin terhadap kepentingan rakyat dan rela mengeluarkan perbelanjaan sendiri untuk menyempurnakan hari bahagia baginda.

Apa yang diperlihatkan oleh baginda bukanlah satu lumrah dalam kehidupan memandangkan dalam kebanyakan keadaan, usaha meningkatkan pendapatan sering merupakan satu rebutan.

Segala kesempatan yang ada biasanya akan dieksploitasi habis-habisan, malah ada kalanya dijadikan pertandingan dalam memartabatkan diri dan meningkatkan status di kalangan kelompok dan golongan seperjuangan.

Mengumpul harta sebanyak mungkin merupakan satu amalan hidup di kalangan me-

reka yang berkesempatan. Kita menghormati mereka yang berusaha keras dan kerja secara bijak menempah kekayaan namun tidak kurang juga mereka yang diberi kesempatan dan kesenangan melalui hubungan tertentu termasuk persaudaraan dan politik.

Saranan Raja Nazrin agar kerajaan membelanjakan peruntukan wang itu untuk projek pembangunan rakyat dan kerelaan baginda menanggung semua kos termasuk untuk jamuan rakyat memperlihatkan sikap tulen seorang raja yang benar-benar berjiwa rakyat yang belum ada tolok bandingnya.

Perasaan saya amat terharu dan begitulah rasanya ribuan rakyat yang taat dan setia kepada raja kita.

Moga-moga sikap dan hati budi baginda mendapat keredhaan dan dirahmati Allah s.w.t dan dijadikan amalan mulia di kalangan mereka yang prihatin terhadap golongan yang lebih memerlukan.

**- DATUK PADUKA AHMAD BASRI  
MOHAMAD AKIL,  
Taman Putra Jaya,  
Tanjung Bendahra, Alor Star.**